

REGIONAL NEWS

HEADLINES:-

1. Truck khalhtu pawl 3-te'n naktuk atanga lirthei din tir an tum chu an sut.
2. Kumin January leh October ni 6 inkar chhunga Dengue natna hri kai mi 449 hmuhchhuah zinga pakhatin nunna a chan.
3. Kawnpui a Police duty te'n nizan khan petrol leh diesel phur truck 2 an man.
4. President Droupadi Murmu-i'n Africa ram 3 tlawh turin zanin hian Algeria a thleng ang.

<><><>

AGITATION

Mizoram Truck Driver Association (MTDA), Mizoram tipper neitu leh khalhtu pawl leh eirawngbawl na gas phurtu Mizoram Indane Driver Welfare te'n naktuk atanga lirthei din tir an tum chu an sut.

Thu dawn danin Aizawl leh Silchar inkar kawngpui dunga Sairang leh Durlui inkar kawng chhe zual pui, lirthei tluk hlauhawm khawpa khuar chhe laite siamthat a nih hma chuan Thawhtanni atangin tlan rih loh ni se an tih chu an thulh rih a. An thulh chhan hi helai siam mektu contractor hian a chhe zual lai hi ni 2 chhunga siamthat vek a intiam a. Chu bakah Mizoram Truck Owners' Association hruaitute'n chak zawka kawng chhe zual lai siamthat a nih theih na'n zing lam dar 8 leh tlai lam dar 5 inkar chhung kawngpui khar rih tura Police lam nen an inrem avangin nawrh hi an thulh ta rih a ni. Nawrh an tum chungchangah hemi hma hian lirthei khalhtu pawl pathumte hian thuchhuah siamin tun thla ni 5 khan Sairang leh Durlui inkar kawng chhia hi October ni 9 hma a siamtha turin a siam hna thawktu NHIDCL hnuai a contractor-te a hrilh niin an sawi a. October ni 9, Nilaini khan a hmunah an zuk en a, hmasawna duhthusam hmuh tur a awm chuang lo niin an sawi a.

Tunah hian contractor-in ni 2 chhunga a chhe zual lai siam that a intiam avang leh chak zawka hna thawh a nih theihna atana Police lamin chhuna kawng an dan pin dawn avangin an nawrh tum hi an thulh leh ta a ni.

Hetih lai hian Mizoram Truck Owners' Association hruaitute chuan tun dinhmunah Mizoramah tuialhthei hi a lo lut tha thawkhat ni a an hriat thu an sawi a. Heti chunga filling station lama lak tur a awm mang si lo hi a chhan ber hi a lang chu Myanmar leh Bangladesh lama man to uchuak taka hralh a nih vang niin an hria a. Hemi chungchangah hian vawiin tlai khan Food, Civil Suppliers & Consumer Affairs Minister an sawipui a ni.

<><><>

DENGUE

Kumin January leh October ni 6 inkar chhung khan Dengue natna hri kai mi 449 hmuhchhuah a ni a, an zinga pakhat hian nunna a chan.

Health & Family Welfare department hotute hnen atanga Akashvani Aizawl-in thu a dawn danin hemi hun chhung hian Dengue vei ni a inringhlel 6,710 awmin an thisen endik sakin an zinga mi 449 chuan an lo vei a ni tih hmuhchhuah a ni a. Dengue hi Aizawl leh Lunglei district-ah a hluar hle a. Aizawl West district-ah sample 2,496 endikin an zinga 168 chuan Dengue an vei a, Aizawl East district-ah sample 1,958 endik zinga 109 in an vei a ni. Lunglei district-ah mi 1,578 sample endik zingah mi 149-in Dengue an vei tih hmuhchhuah a ni bawk. Thla 9 chhunga Dengue vanga thi pakhat hi Aizawl West district ami a ni. Kumin chhunga Dengue vanga nunna chan pakhat tiam hian department-in an chhinchhiah dan chuan Mizoramah Dengue natna thihpui hi mi 8 an awm tawh a ni.

Health department hotute sawi dan chuan Mizorama Dengue natna hmuhchhuah hmasak ber chu kum 2019 khan a ni a. Kum 2020 leh 2021 kha Covid-19 hrileng avanga mipui an inkharkhip hun lai a nih avangin a darh lo tluk a ni a. Kum 2022 atanga hluar leh tanin khami kum khan mi 5-in nunna an chan phah a, kum 2023 khan mi 2 an thi leh bawk. Dengue vanga thite hi Aizawl district ami vek an ni. Nikum kha Mizorama Dengue vei hmuhchhuah tam ber kum a la ni a, mi 12,949 sample lak zinga 2,060-in he natna hri hi an kai a ni.

<><><>

PRESBYTERY

Mizoram Synod hnuaia Inkhawmpui lian ber dawttu Presbytery Inkhawmpui, Ningani atanga tan chu zanin hian a tiak ang.

Presbytery hi 47 a awm chungin tunah hian Presbytery 41-ah inkhawmpui hi kalpui mek a ni a. Presbytery inkhawmpui rorel hi nimin khan zawhfel a ni a. Vawiin chawhma inkhawmah Upa nemngheh inkhawm hun hman a ni a, chawhnu-ah Lalpa Zanriah Sakramen leh Upa thite sunna inkhawm a awm a. Zan inkhawmah Presbytery Moderator kalchhuakte'n Valedictory Sermon an sawi ang a, zanin vek hian a tiak ang. Mizoram Presbyterian kohhran hnuaia a Presbytery 47 zinga 40 hi Mizoram chhung a ni a, 7 hi state pawn ami a ni.

Kum 2021-2022 a kohhran inqharna atanga a lan dan chuan Presbytery 47, Pastor Bial 297, Kohhran 1,130, Minister, Bial vawng 297, Minister, Bial vawng lo 104 leh Pro.Pastor 45 an awm a. Kohhran Upa hi 5,427 awmin dán zawhkim nuai 4, sing 4, sang 6, leh 77 an awm bawk a. Dan zawhkim zinga nuai 3, leh 279 hi mipa niin hmeichhia nuai 3, sing 1, sang 8 leh 575 an ni. Kohhran mi zawng zawng chu nuai 6, sing 1, sang 8 leh 854 an ni a, kohhran chhúngkua ni nuai 1, sing 3, sang 7 leh 161 an ni.

<><><>

SELF DENIAL

Salvation Army India Eastern Territory chuan Territorial Calendar of Events a tarlan a nih angin vawiin khan Self Denial Altar Service - Mahni inphat thawhlawm lak khawm ni a ni a, India Eastern Territory a Corps leh Society hrang hrangah urhsun takin an la khawm.

Mahni inphat thawhlawm lak khawmna hi Thianghlimna Inkhawmah Corps hrang hrang leh Society chuan buatsaihin, inkhawm banah thawhlawm lutte chhiar nghalin zanin Chhandamna Inkhawmah, Corps tinin an hmuh zat an puang chhuak dawn a ni. Mahni inphat thawhlawm hi khawvel ram hrang hranga Salvation Army-te'n anmahni remchan hunah lakkhawm hun an siam thin a, thawhlawm hi Corps atangin Territorial Headquarters (THQ)-ah chhunluh a ni a, THQ-a a luhkim hnuah THQ chuan International Headquarters, Londonah Za-a 42 point 5 a chhunglut thin, hei hi khawvel ram hrang hrang a tul angin kumtin a leilung chhiatna lo thlengte, Indona vanga tuarte, raltlan leh a dang a tul apiangah ah an hmang thin a, THQ chuan Za-a 42 a chan chu Home hrang hrangah te semdarh leh a ni a. Za-a 10 hi Relief Fund-a dah chu Emergency Relief atan leh tanpui ngai a tul ang angahte hman thin a ni a. Za-a 5 hi Division-ah rikrum thila chhawmdawlna'n a pe let leh thin a bawk a ni.

<><><>

FUEL SEIZURE

Nizan dar 9 vel khan Kawnpui Police Station a duty te chuan an thudawn bawhzui-in Kolasib atanga phurh diesel leh petrol phur lirthei pahnih an man a, he thu buatsaih lai thleng hian thubuai ziah luh a la ni lo.

Kawnpui Police duty ten lirthei (SML Tripper) an man te hi MZ-07A/0024 leh a neitu (a khaltu ni bawk) Rorelliana, Kawlchaw, Lawngtlai District a cheng leh AS-11FC/2238 leh a khalhtu hnamdang Natab Uddin, Assam te an ni a, AS-11FC/2238 hi Rorelliana hman hawh ni a hriat a ni. Heng lirthei pahnih hian Petrol litre 4,620 leh Diesel litre 4,400 an phur a, Diesel leh Petrol hi Kolasib Khuangpuilam a ATS Filling Station atanga nimin tlai a an lei niin lirthei khalhtute hian an sawi a. Petrol hi litre khat ah cheng 104 leh pawisa 66 leh Diesel hi litre khatah cheng 86 leh pawisa 95 in ATS Pump atangin an lei niin Rorelliana chuan Kawnpui Police te a hrih a ni.

Thudawanna in a sawi dan chuan tunlai hian Lawngtlai leh a chhehvelah tuialhthei a harsa hle a, diesel leh petrol te hi Lawngtlai leh a chhehvel a a mamawhtute hnenah phalna nei lo leh man to taka hralh tur niin thudawanna chuan a sawi.

Kolasib DCSO Pu Zirliana thupek angin vawiin tlai khan lirthei pahnih leh an thil phurhte hi Kolasib-ah hruai thlak tura ruahman a ni a, lirthei te hi zanin hian DCSO office kawtah dahin, naktukah sorkar thuneitute'n hmalak dan tur an rel ang.

<><><>

ASF

African Swine Fever (ASF) vawk pulhri leng mek chuan zia-awm lam a panin ni khata vawk thi pawh a tlem chho zel a, vawiin khan district 3-ah vawk thi 6 chauh report a awm.

Vawiin khan Lunglei, Serchhip leh Hnahthial district-ah vawk 6 a thi a, heti hian kumin chhunga ASF vawk pulhri avanga vawk thi zat chu 13,874 a tling tawh a, tuna vawk pulhri puan mekna khua a puan hi khaw 245 niin Vety department hotute chuan an sawi. Vawk pulhri darh zel tur venna atan vawiin khan Lunglei district-ah vawk 21 suat a ni a, suat tamna ber chu vawk 10 an talhna Lunglei Venglai-ah a ni a. College vengah vawk 7 suatin Haulawng khua-ah vawk 4 an suat bawk a ni. Kumina vawk pulhri avanga vawk suat zat chu 23,251 a tling tawh a ni.

<><><>

PRESIDENT EMBARKS ON 3 NATION VISIT

African ram 3 - Algeria, Mauritania leh Malawi tlawh turin President Droupadi Murmu-i'n tukin khan New Delhi a chhuahsan a, tun hi President Murmu-in heng ram a tlawh vawi khatna tur a ni.

Ruahman ang chuan President hian zanin dar 9 velah Algeria ram khawpui, Algiers a thleng ang a, ni 3 a cham hnuah Mauritania panin ni 16-ah Algeria a chhuahsan ang a, a tuk ni 17-ah Malawi a pan ang. Heng ram 3 a tlawhnaah hian hruaitu pawimawhte nen ram 2 inkungkaihna chungchangah an inbia ang a, heng rama India mi awmte a kawm bawk ang.

<><><>

MAHARASHTRA CM VOWS

Maharashtra Chief Minister, Eknath Shinde-a'n state minister hlui, NCP hruaitu ni bawk, Baba Siddique kah hlum anih avanga mahni kuta dan kenkawh tumte chungah sorkar a khauh hle dawn tih a sawi. Siddique-a hi nizan khan tu an nih hriat loh-ten Mumbai-ah an kap hlum a ni.

Chief Minister Shinde-a'n thuthar lakhawmtute a hrilh danin, pawl khawihtu nia rinhlelh mi 2 man tawhin pakhat dang zawn mek a ni bawk a, tual thahna thlen dan hi thiamna bik nei, Daya Nayak-a'n a chhui tur thu leh thubuai hi fast-track court-a ngaihtuah a nih tur thu a sawi bawk.

<><><>